



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Munisípiu Ainaro
20 Novembru 2019

Membru grupu LGBTI iha Munisípiu Ainaro foin primeiravés simu formasaun kona-ba asesu ba justisa no sistema demokrásia

Iha 15 Novembru 2019, Judicial System Monitoring Programme (JSMP), kontinua habelar informasaun ba membru grupu minoria sira hanesan Lesbian, Gay, Bisexual, Transgender no Intersexual (LGBTI) iha postu Maubisse Vila kona-ba sira nia direitu asesu ba justisa no partisipasaun públiku iha estadu demokrásia. Aleinde grupu LGBTI, JSMP envolve mós representante estrutura suku, mestre no comunidade sira iha postu refere.

Treinamentu ne'e envolve mestre, membru família, estrutura suku no membru comunidade sira ne'e bazeia ba preokupasaun membru grupu LGBTI sira durante ne'e katak dala barak sira hetan diskriminasaun hosi profesór sira iha eskola, membru família sira, estrutura suku no comunidade sira iha jerál.

Totál partisipante hamutuk ema na'in 28, kompostu hosi grupu LGBTI na'in 12, representante suku no família husi membru LGBTI na'in 14 no mestre hosi Eskola Sekundáriu Santo Inacio na'in 2 (rua).

Materia ba treinamentu konstituí sesaun 2, sesaun primeiru kona-ba demokrásia, kna'ar órgaun soberania sira-nian no prosesu atu halo lei no oinsá mak públiku bele hola parte. Enkuantu sesaun segundu kona-ba asesu ba sistema justisa formál ne'ebé inklui direitu umanu, sistema justisa iha Timor-Leste, tipu krime no nia prosedimentu sira no direitu grupu LGBTI sira.

Treinamentu ne'e ho objetivu atu hasa'e koñesimentu grupu ho karaterístiku espesífiku hanesan LGBTI, família, comunidade, mestre no representante suku sira kona-ba saida mak demokrásia, kna'ar órgaun soberanu sira ida-idak nian, oinsá públiku nia partisipasaun iha prosesu halo lei no asesu ba justisa formál. Aleinde ne'e oinsá mak partisipante sira bele hatutan koñesimentu ne'ebé sira hetan ba membru LGBTI sira seluk, família, estrutura suku no comunidade iha jerál ne'ebé la partisipa iha treinamentu ne'e.

“Treinamentu ne'e nu'udar komitmentu ida atu bele apoiu no fasilita membru grupu LGBTI sira nomós partisipante xave sira atu bele hatene hodi promove ida-idak nia direitu atu asesu ba setór hotu, partikularmente ba membru grupu LGBTI sira oinsá bele promove no asegura sira nia direitu asesu ba setór hotu-hotu inklui mós asesu ba justisa formál,” dehan Diretór Interinu JSMP, Casimiro dos Santos.

Reprezentante Autoridade Lokál sira, Xefe Suku Horai–Kik, Sr. Alcino de Jesus iha sesaun abertura husu ba partisipante sira hodi bele fó atensaun másimu ba materia hirak ne'ebé mak JSMP sei fahe. Xefe Suku konsidera katak materia ne'e importante tebes tanba iha relasaun ida forte tebes ho esperiénsia diskriminativu ne'ebé mak durante ne'e membru LGBTI rasik hasoru husi sira ninia inan-aman, comunidade no mós mestre sira.

Tanba ne'e, Xefe Suku hatutan katak nia apresia no kontente tebes ho prezensa JSMP ne'ebé bele to'o ba sira nia postu hodi fasilita no fahe informasaun sira ne'ebé importante tebes grupu LGBTI sira hodi eleva sira koñesimentu ba sira nia direitu ne'ebé durante ne'e hetan diskriminasaun.

Maioria partisipante sira foin primeiravés partisipa formasaun kona-ba sistema demokrásia no oinsá asesu ba justisa formál. Tanba ne'e, durante sesaun treinamentu ne'e partisipante maioria hatudu sira nia interese boot no atensiozu tebes hodi rona apresentasaun ba materia sira.

Abril da Silva nu'udar membru grupu LGBTI agradese ba JSMP bele fornese informasaun ba sira no JSMP konsidera tebes sira nia problema ne'ebé sira hasoru iha comunidade durante ne'e no nia hato'o katak maioria membru grupu LGBTI foin primeravés tuir formasaun hanesan ne'e. Nia esklarese tan katak grupu LGBTI sira seidak iha koñesimentu kona-ba oinsa hato'o keixa liuhusi sistema justisa formal.

Aliende ne'e partisipante sira seluk hato'o sira-nia agradesimentu boot tebes ba JSMP ne'ebé bele identifika membru LGBTI sira iha postu Maubisse. Sira haktuir katak durante ne'e aleinde membru LGBTI, comunidade Maubisse rasik mós nunca simu informasaun sira hanesan JSMP fornese iha treinamentu ne'e. Formasaun sira hanesan ne'e ajuda tebes sira hodi iha koñesimentu atu oinsá aban-bairua sira bele uja sai matadalan ba prosesu sira nia kazu tuir sistema justisa formál nian.

Treinamentu ne'e realiza tanba hetan apoiu hosi Governu Australia liuhusi Embaixada Australia iha Timor-Leste hamutuk ho Ajénsia Internasionál Governance for Development (GfD) Austrália.

Atu hetan informasaun liután favor kontaktu:

Casimiro dos Santos
Diretór Interino JSMP
Diresaun e-mail: casimiro@jsmp.tl
Telefone: 3323883 | 77257466